

El doping de una volta

Mio nono xe pien de storie e ogni volta che per television senti parlar de doping ne conta la storia de Marieto che xe andà a far la gara de bicicleta che mi tanto me piazì.

Partimo del inizio, o quasi. Marieto xe un dei migliori amici de mio nono Bepi de sempre. Dopo la guera, de muli, i ga sentì tanto parlar de Coppi e Bartali che ghe xe vignù voja anche a lori de andar in bicicleta.

Dopo un per de anni de alenamento su e zo per l'Istria, su strade bianche, che tanto altre no ghe jera, Marieto ga deciso de provar andar a far una gara. No ga scelto una gara facile, ma una gara a tappe in Dalmazia. El vien de nono :«Bepi, dei menime ala gara, careghemo la bici in tela Lancia, cioghemo un pochi de tubolari de riserva e 'ndemo», e i xe andadi.

I riva a Zara dove i gaveva un amico de nome Bruno, anche lui ciclista, che ghe ga dà una man per iscriversè ala gara. La prima giornada de gara Marieto xe rivà tra gli ultimi e mezo morto. Apena ga rivà denovo respirar ghe dizi a nono: »Bepi mio, la xe dura, ancora un giorno cussì e moro, te me dovesi proprio dar una man.«

Bepi pensa un poco e ghe dizi »Te ga proprio ragion, se no te juto mi, te rivi dopo la dona del late e i dirà che i capodistriani no val niente; bon, bon va ti riposar, che mi penserò come fregarli domani.“

E cussì mio nono Bepi ghe ga pensà una dele sue. La matina Mario se sveia e ghe domanda: “Alora Bepi, rivemo fregarli ogi o cosa?”

E nono ghe dizi: “Li fregghemo, li fregghemo, ti solo te devi far quel che te digo.”.

E cussì Marieto parti per la seconda tapa de la gara. Dopo venti chilometri resta indrio. Alora, nono Bepi che segui la gara con la Lancia, raggiungi Marieto che pedala ormai solo e quando lo pasa ghe dà un tapo de sughero ligà per un fil de spagna e ghe dizi: “Mario, meti el tapo in boca che te tiro!” E cussì, Marieto pedala dieci metri drio l'auto con l'invisibile aiuto del fil de spagna. Cussì, pian pianin ciapa velocità.

I fa un per de chilometri e nono Bepi vedi che davanti, in una Skoda blu, iera i giudici, e Bepi ciga: “Mario, mola!, mola!”.

Ma Marieto no sentiva, parlarlar no podeva perché gaveva el tapo in boca, e alora ga molà al ultimo momento. Bepi ga rivà molar el fil de spagna per tera e i giudici no lo ga visto, ma Marieto ghe xe pasà davanti come una bala de sciopo. Rivà al traguardo con poco distaco se ga ciapà una bela strilada dai giudici, ma per fortuna no i gaveva visto el fil de spagna, ma i credeva che el se gaveva solo ciapà per un auto che pasava, e no i lo ga squalificà.

Dopo la gara, Bepi ghe dizi: “Cosa no te ga molà el tapo quando te go dito? No te iuto più.”

E Marieto ghe dizi : “Mi te domandavo perché devo molar, ma no se capiva perché gavevo el tapo in boca. Bepi deso no abbandonarme, che go rimontà. Dopo che te me ga tirà go avù la forza de rivar fino alla fine.”

E cussì Marieto xe andà ala terza tapa. I parti ala matina e anche sta volta, dopo un poco, Marieto resta indrio. Sta volta, nono Bepi decidi de darghe proprio una man, lo raggiungi con la Lancia e con una man lo fracca. Per fortuna, nono Bepi gaveva i braci forti e riva fracarlo per un bel toco, pecà che stavolta la Skoda dei giudici xe sconta drio un albero e li vedi proprio quando i ghe pasa davanti. Mario squalificà. I capodistriani torna a casa con le recie zo.

Ancora deso Bepi dizi: “No merita proprio imbrìoiar, cosa sto doping che i fa oggi giorno, ancora no i ga capi che xe meo rivar dopo la dona del late, ma con le proprie forze.”

LEON KRIŽMAN

Capodistria 29/09/2004

Manžan 46A 6000 Capodistria

Scuola: Ginnasio Antonio Sema Pirano

Classe: II

Insegnante: Dora Manzo